

საქართველოს კანონი

საქართველოს შინაგან საქმეთა სამინისტროს საჯარო სამართლის იურიდიული პირის – „112“-ის შექმნის შესახებ

თავი I ზოგადი დებულებები

მუხლი 1. კანონის მიზანი

ამ კანონის მიზანია საქართველოს შინაგან საქმეთა სამინისტროს საჯარო სამართლის იურიდიული პირის – „112“-ის (შემდგომ – „112“) შექმნა, მისი საქმიანობის ძირითადი პრინციპებისა და მიმართულებების განსაზღვრა.

მუხლი 2. „112“-ის საქმიანობის სამართლებრივი საფუძველი

„112“-ის საქმიანობის სამართლებრივი საფუძველია საქართველოს კანონმდებლობა და „112“-ის დებულება, რომელსაც ამტკიცებს საქართველოს შინაგან საქმეთა მინისტრი (შემდგომ – მინისტრი).

თავი II ძირითადი დებულებები

მუხლი 3. „112“-ის სამართლებრივი სტატუსი

„112“ არის ამ კანონით დაფუძნებული, საქართველოს შინაგან საქმეთა სამინისტროს მმართველობის სფეროში მოქმედი საჯარო სამართლის იურიდიული პირი.

მუხლი 4. „112“-ის მიზანი და საქმიანობის ძირითადი მიმართულებები

1. „112“-ის მიზანია სხვა უფლებამოსილ სუბიექტებთან კოორდინირებული საქმიანობით საგანგებო სიტუაციებსა და საქართველოს კანონმდებლობით განსაზღვრულ სხვა შემთხვევებში გადაუდებელი დახმარების ოპერატიული და ეფექტიანი მართვა და ამ მიზნით შეტყობინებების მიღება ერთიანი სატელეფონო ნომრის – „112“-ის – საშუალებით.

2. „112“-ის საქმიანობის ძირითადი მიმართულებებია:

ა) საგანგებო სიტუაციებისა და გადაუდებელი დახმარების აუცილებლობის სხვა შემთხვევების შესახებ შეტყობინებების მიღება, დამუშავება, შეფასება და მათზე შემდგომი რეაგირებისათვის შესაბამისი სუბიექტებისათვის ინფორმაციის მიწოდება;

ბ) საგანგებო სიტუაციებისა და გადაუდებელი დახმარების აუცილებლობის სხვა შემთხვევების მართვის მიზნით სხვა უფლებამოსილ სუბიექტებთან კოორდინირებული საქმიანობა;

გ) საგანგებო სიტუაციებისა და გადაუდებელი დახმარების აუცილებლობის სხვა

შემთხვევების აღრიცხვა, ანალიზი და შესაბამისი სტატისტიკის წარმოება;

დ) „112“-ის კომპეტენციისთვის მიკუთვნებულ საკითხებზე საქართველოს და უცხო ქვეყნის შესაბამის უწყებებთან/დაწესებულებებთან თანამშრომლობა;

ე) საქართველოს კანონმდებლობით გათვალისწინებული სხვა უფლებამოსილებების განხორციელება.

3. „112“-ის საქმიანობის სფეროში შემავალი საგანგებო სიტუაციებისა და გადაუდებელი დახმარების აუცილებლობის სხვა შემთხვევები, „112“-ის ფუნქციები და უფლებამოსილებები განისაზღვრება „112“-ის დებულებით.

4. ამ მუხლის მე-2 პუნქტით გათვალისწინებულ საკითხებზე შეიძლება გამოიცეს მინისტრის ნორმატიული აქტი.

მუხლი 5. „112“-ის მართვა და წარმომადგენლობა

1. „112“-ს ხელმძღვანელობს „112“-ის დირექტორი, რომელსაც თანამდებობაზე ნიშნავს და თანამდებობიდან ათავისუფლებს მინისტრი.

2. „112“-ის დირექტორი:

ა) წარმოადგენს „112“-ს;

ბ) იღებს გადაწყვეტილებას (გამოსცემს სამართლებრივ აქტს) „112“-ის კომპეტენციისთვის მიკუთვნებულ საკითხზე;

გ) თანამდებობებზე ნიშნავს და თანამდებობებიდან ათავისუფლებს „112“-ის თანამშრომლებს;

დ) საქართველოს კანონმდებლობით დადგენილი წესით განკარგავს „112“-ის სახსრებსა და ქონებას;

ე) ახორციელებს „112“-ის დებულებით განსაზღვრულ სხვა უფლებამოსილებებს.

3. „112“-ის დირექტორს ჰყავს მოადგილეები, რომლებსაც თანამდებობებზე ნიშნავს და თანამდებობებიდან ათავისუფლებს „112“-ის დირექტორი.

4. „112“-ის დირექტორის მოადგილეების რაოდენობა და უფლებამოსილებები განისაზღვრება „112“-ის დებულებით.

მუხლი 6. „112“-ის სტრუქტურა

1. „112“ თავის უფლებამოსილებებს ახორციელებს სტრუქტურული ერთეულების მეშვეობით.

2. „112“-ის სტრუქტურა და სტრუქტურული ერთეულების კომპეტენცია განისაზღვრება „112“-ის დებულებით.

მუხლი 7. „112“-ის ქონება

1. „112“-ს საკუთარი მიზნების განსახორციელებლად და ფუნქციების შესასრულებლად აქვს ქონება, რომლის შექმნის წესი განისაზღვრება საქართველოს კანონმდებლობით.

2. „112“-ის ქონება შედგება ძირითადი და საბრუნავი საშუალებების, აგრეთვე სხვა მატერიალური ფასეულობებისა და ფინანსური რესურსებისაგან, რომლებიც აისახება „112“-ის დამოუკიდებელ ბალანსზე.

მუხლი 8. „112“-ის დაფინანსება

1. „112“-ის დაფინანსების წყაროებია:

ა) სახელმწიფო ბიუჯეტიდან გამოყოფილი სახსრები;

ბ) ადგილობრივი თვითმმართველი ერთეულის ბიუჯეტიდან გამოყოფილი სახსრები;

გ) „112“-ის მომსახურების საფასური;

დ) ხელშეკრულების საფუძველზე შესრულებული სამუშაოდან მიღებული შემოსავალი;

ე) საქართველოს კანონმდებლობით ნებადართული სხვა შემოსავლები.

2. „112“-ის მომსახურების საფასურს, საფასურის გადამხდელი პირების წრეს და მათთან დაკავშირებულ სხვა საკითხებს განსაზღვრავს საქართველოს მთავრობა.

3. ამ მუხლის პირველი პუნქტით გათვალისწინებული სახსრები და შემოსავლები სრულად ხმარდება „112“-ის მიზნების განხორციელებას და საქართველოს შინაგან საქმეთა სამინისტროს სისტემის განვითარების ხელშეწყობას.

მუხლი 9. „112“-ის სახელმწიფო კონტროლი

„112“-ის სახელმწიფო კონტროლს ახორციელებს საქართველოს შინაგან საქმეთა სამინისტრო.

მუხლი 10. „112“-ის საქმიანობის შეწყვეტისა და ლიკვიდაციის წესი

„112“-ის საქმიანობის შეწყვეტა და ლიკვიდაცია ხორციელდება საქართველოს კანონმდებლობით დადგენილი წესით.

თავი III

გარდამავალი და დასკვნითი დებულებები

მუხლი 11. გარდამავალი დებულებები

1. საქართველოს შინაგან საქმეთა მინისტრმა 2012 წლის 1 იანვრამდე:

ა) დაამტკიცოს საქართველოს შინაგან საქმეთა სამინისტროს საჯარო სამართლის იურიდიული პირის – „112“-ის დებულება;

ბ) თანამდებობაზე დანიშნოს საქართველოს შინაგან საქმეთა სამინისტროს საჯარო სამართლის იურიდიული პირის – „112“-ის დირექტორი;

გ) უზრუნველყოს საქართველოს შინაგან საქმეთა სამინისტროს საჯარო სამართლის იურიდიული პირის – „112“-ის შექმნისათვის აუცილებელი სხვა ორგანიზაციული ღონისძიებების განხორციელება.

2. საქართველოს ეკონომიკისა და მდგრადი განვითარების სამინისტრომ უზრუნველყოს საქართველოს შინაგან საქმეთა სამინისტროს საჯარო სამართლის იურიდიული პირის – „112“-ის ფუნქციონირებისათვის აუცილებელი ქონების საქართველოს კანონმდებლობით დადგენილი წესით „112“-ისათვის გადაცემა.

მუხლი 12. კანონის ამოქმედება

ეს კანონი ამოქმედდეს გამოქვეყნებისთანავე.

თბილისი,
2011 წლის 24 ნოემბერი.
№5339-ილ